



SAMKEPPNISEFTIRLITIÐ

Miðvikudagur, 2. september 2015

Ákvörðun nr. 22/2015

Kaup SF VII slhf. á hlut í Kynnisferðum hf.

I.

Málavextir og málsmeðferð

Samkeppniseftirlitinu barst bréf þann 15. apríl sl. þar sem tilkynnt var um breytingu á yferráðum Kynnisferða ehf. (hér eftir Kynnisferðir). Að mati samrunaaðila er breytingum á yferráðum þannig háttað að til sameiginlegra yferráða eignarhaldsfélagsins Ölfu hf. (hér eftir Alfa). og SF VII ehf. (hér eftir SF VII) stofnast. Segir að til þessa sameiginlegu yferráða stofnist á grundvelli fjárfestingar SF VII á um þriðjungshlut í Kynnisferðum af Ölfu en auk þess gera hluthafarnir með sér hluthafasamkomulag þar sem kveðið er á um hvernig staðið skuli að stærri ákvörðunum félagsins. Áður en til þessara viðskipta kom fór Alfa eitt með yferráð yfir félaginu.

Með tilkynningu um samrunann fylgdi svonefnd styttri samrunaskrá með upplýsingum um hann, sbr. 6. mgr. 17. gr. a samkeppnislaga nr. 44/2005 og reglur Samkeppniseftirlitsins nr. 684/2008 um tilkynningu og málsmeðferð í samrunamálum og viðauka II við þær (styttri tilkynning). Samkeppniseftirlitið féllst á að nægilegt hafi verið að skila inn styttri samrunaskrá þar sem samruninn varðar ótengda markaði, sbr. a-lið 6. mgr. 17. gr. a samkeppnislaga. Með bréfi dags. 17. apríl sl. tilkynnti Samkeppniseftirlitið samrunaaðilum að samrunatilkynningin teldist fullnægjandi.

Með bréfi dags. 26. maí sl. var samrunaaðilum tilkynnt um að Samkeppniseftirlitið teldi ástæðu til frekari rannsóknar á samkeppnislegum áhrifum samrunans, sbr. 1. mgr. 17. gr. d. samkeppnislaga nr. 44/2004. Málinu lyktaði með því að samrunaaðilar gengust undir tiltekin skilyrði með sátt við Samkeppniseftirlitið, dags. 17. júlí sl. Tilurð sáttarinnar má rekja til þeirra samkeppnisbresta sem kunna að felast í tengslum viðskiptabanka við Kynnisferðir sem og eignarhald sömu hluthafa í fleiri en einu fyrirtæki á sama samkeppnismarkaðnum. Í þessari ákvörðun er gerð nánari grein fyrir forsendum þess að grípa þurfti til íhlutunar í málinu.

II.

Samruninn

Samkvæmt 17. gr. samkeppnislaga telst samruni hafa átt sér stað þegar breyting á yferráðum verður til frambúðar. Er nánar tilgreint í a. til d. liðum 1. mgr. 17. gr. samkeppnislaga í hvers konar aðgerðum samruni getur falist. Í samrunaskrá segir að SF VII sé ætlað að halda utan um allt að 35% hlut í Kynnisferðum á móti eignarhaldsfélaginu Ölfu. Kynnisferðir er eitt stærsta fyrirtækið í þjónustu tengdri ferðamannaíðnaðinum á Íslandi og hefur félagið með höndum umfangsmikla starfsemi honum tengdum. Undir samstæðunni er ferðaskrifstofa, hópbílaferðir ýmis konar, og



bílaleiga. SF VII er eignarhaldsfélag að stærstu leyti í eigu fagfjárfesta, félagið er í rekstri hjá sjóðastýringarfyrirtækinu Stefni hf.¹ (hér eftir Stefnir), dótturfélagi Arion banka. Alfa er eignarhaldsfélag og eru hluthafar þess einkaaðilar en í samrunaskrá segir að hluthafar þess séu 28 talsins. Fyrirtæki undir yfirráðum Alfa eru m.a. Kynnisferðir og Tékkland bifreiðaskoðun.

Um markmið fjárfestingarinnar segir að hluthafar skuli í sameiningu stuðla að frekari vexti Kynnisferða og félaga innan samstæðu þeirra og vinna að því að gera fyrirtækið skráningarhæft innan þriggja til fimm ára á íslenska hlutabréfamarkaðnum.

Nánar um SF VII

SF VII er samlagshlutafélag sem er að fullu í eigu SÍA II slhf. (hér eftir SÍA II) sem er framtaksfjárfestingarsjóður í rekstri hjá Stefni. Í samrunaskrá segir að Stefnir hafi gert rekstrarsamning við SÍA II sem feli það í sér að fyrirtækið skuli annast stýringu á eignum félagsins, þ. á m. SF VII, og veita SÍA II ráðgjöf í samræmi við samþykktir og áskriftarsamninga SÍA II og aðrar almennar lagareglur. Í því felist að Stefnir sjái um mörg atriði sem teljist til daglegrar og almennrar starfsemi SÍA II en þrátt fyrir það skuli allar fjárfestingar SÍA II vera samþykktar af sérstöku fjárfestingarráði. Þannig falli allur daglegur rekstur undir hlutverk Stefnis skv. rekstrarsamningnum en ákvarðanir um einstaka fjárfestingar þess falli undir valdsvið fjárfestingarráðs SÍA II. Eini tilgangur SF VII sé að halda utan um allt að 35% hlut í Kynnisferðum en í rekstrarsamningi kemur fram að hann sé uppsegjanlegur með sex mánaða fyrirvara.

Segir að innan SÍA II sé starfrækt sérstakt fjárfestingaráð í samræmi við ákvæði í samþykktum félagsins. Fjárfestingaráðið sé skipað fimm fulltrúum, kjörnum á aðalfundi til eins árs í senn. Segir að allar fjárfestingar SÍA II skuli bornar undir og samþykktar af fjárfestingaráði og þurfi samþykki meirihluta fjárfestingaráðs til að samþykkja einstaka fjárfestingar. Enginn starfsmaður Stefnis eigi sæti í fjárfestingaráði SÍA II. Hluthafar SÍA II eru að stærstu leyti fagfjárfestar og eru helstu hluthafar Gildi lífeyrissjóður, LSR og Stapi lífeyrissjóður.

Hluthafasamkomulag Alfa og SF VII kveður m.a. á um tiltekið fyrirkomulag á stjórnarskipan félagsins, meiriháttar ákvörðunartöku samstæðunnar og sameiginlega framtíðarsýn. Alfa er alfarið í einkaeigu. Í hluthafasamkomulaginu segir að stjórn félagsins skuli skipuð fimm einstaklingum og tveimur til vara. SF VII mun eiga rétt á því að skipa tvo stjórnarmenn í aðalstjórn og einn í varastjórn, Alfa mun skipa aðra stjórnarmenn. Aukinn meirihluta þarf við allar meiriháttar ákvarðanir og telst stjórn ekki ályktunarbær nema bæði fulltrúar SF VII og Alfa séu mættir. Í hluthafasamkomulaginu er nánar tilgreint hvaða ákvarðanir teljast meiriháttar.

Tengsl Arion banka hf. við viðskiptin

Stefnir er eins og áður segir dótturfélag Arion banka og er fyrirtækið stærsta sjóðastýringafyrirtæki landsins með um 415 ma. króna í virkri stýringu. Fyrirtækið er sjálfstætt starfandi fjármálafyrirtæki skv. lögum nr. 161/2002 um fjármálafyrirtæki. Félagið rekur verðbréfa-, fjárfestingar- og fagfjárfestastjóði skv. lögum nr. 128/2011. Auk

¹ Stefnir hf. er sjálfstætt starfandi fjármálafyrirtæki sem rekur verðbréfasjóði, fjárfestingasjóði og fagfjárfestastjóði. Eignarhald félagsins er að mestu í höndum Arion banka hf. (99,93%).



Þessa hefur félagið starfsleyfi til eignastýringar, fjárfestingarráðgjafar, vörslu og stjórnunar fjármálagerninga í sameiginlegri fjárfestingu.²

Bankinn er jafnframt hluthafi í SÍA II með 7,5% hlut. Í stjórn Stefnis sitja fimm menn, en einn þeirra er háður Arion banka. Í samrunaskrá segir að viðkomandi sé ekki lykilstarfsmaður hjá Arion banka og hann hafi ekki aðkomu að ákvörðunum sem séu viðskiptalegs eðlis. Segir að hann starfi á sviði innan bankans þar sem ekki geta komið upp hagsmunaaðrekstrar vegna starfsemi Stefnis. Með sátt við Samkeppniseftirlitið hafa takmarkanir verið settar á aðkomu Arion banka að Kynnisferðum á þann veg að þeir stjórnarmenn er skipaðir verða í krafti eignarhlutar SF VII skuli verða óháðir bankanum. Þá gilda enn fullum fetum fyrri ákvarðanir Samkeppniseftirlitsins sem kveða á um sjálfstæði Stefnis gagnvart Arion banka og það hátterni sem fyrirtækjunum er heimilt s.s. varðandi viðskipti milli tengdra aðila og fleira, sbr. nánari atvikalýsing í fyrrnefndnum ákvörðunum eftirlitsins nr. 2/2014 *Kaup SF IV slhf. á Skeljungu hf.* og nr. 7/2014 *Kaup Bekei hf. á Bakkanum vöruhótelu ehf., ELKO ehf., EXPO Kópavogi ehf., ISP á Íslandi ehf., Kaupási ehf. og fasteignum í eigu Smáragarðs ehf.*

III.

Niðurstaða

Kaup SF VII á hlut í Kynnisferðum fela í sér samruna í skilningi samkeppnislaga. Samkeppniseftirlitinu ber að grípa til íhlutunar vegna samruna sé hann talinn geta hindrað virka samkeppni samkvæmt V. kafla samkeppnislaga. Í ákvörðun þessari er ætlað að gera grein fyrir forsendum fyrir íhlutun vegna samrunans. Einnig er gerð grein fyrir þeim skilyrðum sem eftirlitið telur nauðsynlegt að samrunaaðilar lúti í starfsemi sinni í þeim tilgangi að koma í veg fyrir samkeppnislegar hindranir sem samruninn myndi annars geta leitt af sér.

1. Markaður

Í samrunaskrá segir að Kynnisferðir starfi á fjórum mismunandi mörkuðum tengdum ferðamannaíðnaðinum. Þar kemur einnig fram að Tékkland, sem er undir yfirráðum Alfa, starfi á markaði fyrir bifreiðaskoðun. Varðandi þá markaði sem Kynnisferðir starfi á segir að þeir séu:

- a) Markaður fyrir ferðaskrifstofur
- b) Markaður fyrir alhliðaðþjónustu hópþifreiða
- c) Markaður fyrir bílaleigu
- d) Markaður fyrir útleigu atvinnuhúsnæðis

Um starfsemi SF VII segir að fyrirtækið starfi á markaði fyrir fjárfestingarstarfsemi. Ennfremur segir í samrunaskrá að viðskiptin séu þess eðlis að þau komi ekki til með að hafa nokkur áhrif á rekstur Kynnisferða eða dótturfélaga þess. Samruninn breyti í engu markaðsgerð eða markaðshlutdeild aðila á framangreindum mörkuðum. Um sk. samsteypusamruna (e. conglomerate merger) sé að ræða og því ekki um að ræða samþjöppun á nokkrum markaði málsins og segir að samruninn leiði ekki til þess að markaðsráðandi staða verði til eða slík staða styrkist.

² Samkvæmt heimasíðu Stefnis, sótt 20. júlí sl.



Í meginatriðum getur Samkeppniseftirlitið fallist á framangreint og því er ekki tilefni til ítarlegrar markaðsskilgreiningar á þeim mörkuðum sem fyrirtæki undir yfirráðum samrunaaðila starfa á enda er ekki um að ræða samþjöppun á nokkrum þeirra. Þeir samkeppnisbrestir sem kunna að skapast vegna þessa máls eru ekki vegna aukningar á samþjöppun á mörkuðum. Mögulegir samkeppnisbrestir stafa af tengslum viðskiptabanka við fyrirtæki í samkeppnisrekstri sem og eignarhaldi sömu hluthafa í fleiri en einu fyrirtæki á samkeppnismarkaði. Verður nánar gert grein fyrir þessu síðar í ákvörðuninni.

2. Samkeppnisleg áhrif samrunans

Samkeppniseftirlitið hefur frá hruni beitt sér gagnvart eignarhaldi banka og lífeyrissjóða á atvinnufyrirtækjum, en eignarhald þessa aðila getur við tiltekna aðstæður skapað hættu á samkeppnishindrunum. Í kjölfar fjárfestingar SF VII í Kynnisferðum munu helstu eigendur fyrirtækisins verða lífeyrissjóðir og aðrir fagfjárfestar. Þá mun Stefni, dótturfélag Arion banka, hafa töluverða aðkomu að rekstri Kynnisferða líkt og lauslega hefur verið vikið að. Í fyrri ákvörðunum Samkeppniseftirlitsins hefur verið gerð ítarlega grein fyrir aðkomu bankans að Stefni og félögum með rekstrarsamninga við Stefni. Í því sambandi vísast til fyrri ákvarðana eftirlitsins sbr. ákvörðun nr. 2/2014 *Kaup SF IV slhf. á Skeljungu hf.* og ákvörðunar nr. 7/2014 *Kaup Bekei hf. á Bakkanum vöruhóтели ehf., ELKO ehf., EXPO Kópavogi ehf., ISP á Íslandi ehf., Kaupási ehf. og fasteignum í eigu Smáragarðs ehf.* Rétt er að benda á að í þessu máli er aðkoma Stefnis og Arion banka umfangsminni en í nefndum ákvörðunum en þó eiga að hluta til sömu sjónarmið við í þessu tilviki og í þeim málum.

Samkeppniseftirlitið hefur gefið út skýrslur þar sem fjallað er um samkeppni á bankamarkaði m.a. í skýrslu nr. 1/2013 *Fjármálaþjónusta á krossgötum*. Ein af þeim ályktunum sem þar voru dregnar er að tilhneiging virðist vera til þess að viðskipti einstakra fyrirtækja haldist innan samstæðu einstakra viðskiptabanka, t.a.m. viðskipti á sviði fjárfestingabankastarfsemi, viðskiptabankastarfssemi og sjóðastýringar.

Samkeppniseftirlitið telur það nauðsynlegt fyrir heilbrigða samkeppni á fjármálamarkaði að viðskipti fyrirtækja við samstæður stóru bankanna þriggja byggji á viðskiptalegum forsendum og mismunandi tegundir þjónustu séu ekki samtvinnaðar. Einnig er afar mikilvægt að viðskipti innan einstakra samstæðna séu á viðskiptalegum forsendum, þá sérstaklega þegar slík viðskipti varða starfsemi sem byggir á sérstökum starfsleyfum, s.s. sjóðastýringa og fjárfestingabankastarfssemi. Minnsti þrýstingur á samtönnun þjónustu sem hver samstæða veitir, getur leitt til samkeppnishamlandi útilokunar keppinauta á fjármálamarkaði.

Í áður útgefnu efni Samkeppniseftirlitsins³ hefur verið vikið að þeirri stöðu sem íslenska hagkerfið er í. Ljóst er að fjárhagslegur styrkleiki og umsvif lífeyrissjóða eru veruleg í íslensku atvinnulífi. Í kjölfar bankahrunsins var þörf á endurskipulagningu meirihluta íslenskra fyrirtækja og er henni nú svo gott sem lokið.⁴ Mörg þeirra fyrirtækja sem lokið hafa endurskipulaginu hafa notið fjármagns frá lífeyrissjóðum í því ferli. Í ljósi þess að

³ Sjá meðal annars ræðu Páls Gunnars Pálssonar forstjóra Samkeppniseftirlitsins frá 15. nóvember 2013, ræðan er aðgengileg á heimasíðu eftirlitsins.

⁴ Samkeppniseftirlitið hefur fjallað ítarlega um endurskipulagningu atvinnulífsins eftir bankahrunið, sjá m.a. skýrslur eftirlitsins nr. 2/2011, 3/2013 og 3/2013



fáir lífeyrissjóðir fara með meirihluta fjármagns íslenskra lífeyrissjóða kann að vera nauðsynlegt í einhverjum tilfellum að sami lífeyrissjóðurinn komi að fjárfestingu í fleiri en einu fyrirtæki á sama samkeppnismarkaðnum.⁵ Samkeppniseftirlitið er meðvitað um þá hættu sem skapast augljóslega af því að sami aðili sé hluthafi í mörgum félögum á sama samkeppnismarkaði. Kallar aðstaða sem þessi á mikla ábyrgð og fagmennsku á meðferð eignahluta lífeyrissjóða og skýra eigendastefnu. Þá er rétt að geta þess að ákvæði 10. gr. samkeppnilaga um ólögmeitt samráð gildir að fullum fetum um starfsemi lífeyrissjóða.

Á hluta af þeim samkeppnismörkuðum sem mál þetta varðar, verður sú staða uppi að sömu lífeyrissjóðirnir komi að fleiri en einu fyrirtæki á sama samkeppnismarkaðnum. Hjá Samkeppniseftirlitinu liggur fyrir erindi er varðar breytingu á yferráðum hjá einum af helsta samkeppnisaðila Kynnisferða á markaði fyrir alhliðþjónustu hópferðabíla, Allrahanda.⁶ Í báðum tilvikum er um að ræða að fjárfestingarfélag í rekstri sjóðastýringarfyrirtækis sem kaupir minnihluta í fyrirtækjunum og verður aðili að hluthafasamkomulagi sem veitir því aðild að sameiginlegum yferráðum. Eftir afgreiðslu þessara erinda verða hluthafar í þessum fjárfestingarfélögum nokkrir af stærstu fagfjárfestum landsins og fara þá sömu lífeyrissjóðirnir með um þriðjung af hlutafé í fjárfestingarfélögunum.

Með vísan til þeirra atvika sem að framan hafa verið rakin telur Samkeppniseftirlitið mögulega samkeppnisbresti vegna þessa samruna stafa af annars vegar tengslum Arion banka við SF VII og hins vegar væntanlegan eignarhluta hluthafa SF VII í stærsta samkeppnisaðila Kynnisferða, Allrahanda.

3. Íhlutun

Með hliðsjón af öllu framangreindu er það mat Samkeppniseftirlitsins að nauðsynlegt sé að setja umræddum samruna skilyrði. Skilyrðunum er ætlað að tryggja sjálfstæði Kynnisferða sem keppinautar á markaði gagnvart Arion banka. Þá er jafnframt kveðið á um tiltekna meðferð á trúnaðarupplýsingum gagnvart þeim aðilum sem eiga hluti í öðrum fyrirtækjum sem starfa á sama samkeppnismarkaðnum. Samrunaaðilar lýstu yfir vilja sínum til þess að gangast undir sátt í málinu á grundvelli 17. gr. f. laganna og 22. gr. málsmeðferðarreglna Samkeppniseftirlitsins nr. 880/2005. Viðræður við samrunaaðila hafa í kjölfarið leitt til sáttar, sem fela í sér þau skilyrði sem fram koma í ákvörðunarorðum. Telur Samkeppniseftirlitið að þau leysi hin samkeppnislegu vandamál sem af samrunanum kynnu ella að stafa. Fela skilyrðin meðal annars í sér áskilnað um sjálfstæði stjórnar Kynnisferða gagnvart Arion banka og um meðferð trúnaðarupplýsinga gagnvart þeim hluthöfum sem eiga hluti í fleiri en einu fyrirtæki á sama samkeppnismarkaðnum.

Í ákvæði 1.2 a) í framangreindri sátt er kveðið á um óhæði stjórnarmanna Kynnisferða gagnvart Arion banka. Í ljósi framangreindrar aðkomu bankans að Kynnisferðum telur Samkeppniseftirlitið nauðsynlegt að tryggja að stjórnarmenn verði óháðir bankanum. Eftirlitið hefur í ræðu og riti gert ítarlega grein fyrir þeim samkeppnisbrestum sem fólgnir geta verið í aðkomu viðskiptabanka að fyrirtækjum í samkeppnisrekstri á ótengdum

⁵ Stærð íslenska lífeyrissjóðakerfisins er um 150% af landsframleiðslu eða um 3000 ma. króna.

⁶ Samkeppnismarkaðurinn er skilgreindur með þessum hætti í samrunaskrá, Samkeppniseftirlitið telur ekki tilefni til ítarlegrar rannsóknar á markaði þessu máls í ljósi atvika málsins.



mörkuðum. Í b-lið ákvæðisins eru settar ítarlegri kröfur um óhæði Kynnisferða gagnvart bankanum með því að Stefni skuli vera óheimilt að ráða framkvæmdastjóra eða lykilstarfsmenn sem háðir eru bankanum. Í hluthafasamkomulaginu er kveðið á um aðkomu Stefns að þessum atriðum.

Með skilyrðum í ákvæði 1.3 er ætlað að koma í veg fyrir að þeir hluthafar sem koma að fleiri en einu fyrirtæki á sama samkeppnismarkaðnum fái í hendur viðkvæmar viðskiptaupplýsingar. Veiting slíkra upplýsinga kynni að raska samkeppnislegu sjálfsstæði Kynnisferða og skapa ranga hvata í samkeppni á milli fyrirtækja á markaði. Þannig er kveðið á um að stjórn og starfsmenn SF VII skuli haga samskiptum sínum við hluthafa Kynnisferða þannig að gætt sé að samkeppni sé ekki raskað á viðkomandi markaði. Þá skal þess gætt að í upplýsingamiðlun til hluthafa félagsins sem einnig eiga eignarhluti í keppinautum þess berist ekki viðkvæmar viðskiptaupplýsingar sem skaðað geta samkeppni. Þá er í lok skilyrðanna fjallað um brottfall þeirra og réttur samrunaaðila til endurupptöku áréttáður, sbr. 24. gr. stjórnarsýslulaga nr. 37/1993.

IV. Ákvörðunarorð:

Kaup SF VII slhf. á hlut í Kynnisferðum ehf. fela í sér samruna í skilningi 17. gr. samkeppnislaga nr. 44/2006. Með heimild í 17. gr. samkeppnislaga eru samrunanum sett skilyrði. Með setninga á eftirfarandi skilyrðum er ekki þörf á að ógilda samrunann:

1.

Aðgerðir gegn skaðlegum hagsmunatengslum og öðrum samkeppnishindrunum.

1.1

Almennt

Markmið sáttar þessarar er að sporna gegn skaðlegum hagsmunatengslum og öðrum samkeppnishindrunum sem stafað geta af eignarhaldi SF VII á hlut í Kynnisferðum og beinu og óbeinu eignarhaldi hluthafa SF VII á öðrum atvinnufyrirtækjum. Skulu þessir aðilar í því skyni og eins og þeim frekast er unnt tryggja sjálfstæði Kynnisferða á þeim mörkuðum sem fyrirtækið starfar.

1.2

Sjálfstæði Kynnisferða

Við skipan stjórnar og stjórnenda Kynnisferða skal SF VII tryggja samkeppnislegt sjálfstæði félagsins með eftirgreindum hætti:

- a) Stjórnarmenn í Kynnisferðum skulu vera óháðir Arion banka hf. (hér eftir Arion banki). Þeir teljast óháðir ef þeir eru ekki starfsmenn eða stjórnarmenn hjá bankanum, framkvæmdastjórar eða stjórnarmenn hjá fyrirtækjum þar sem bankinn eða dótturfélög eiga meira en 20% eignarhlut, eru ekki makar stjórnarmanns eða framkvæmdastjóra (forstjóra) hjá ofangreindum aðilum eða skyldir þeim í beinan legg. Einnig telst stjórnarmaður óháður ef hann er ekki verulega háður Arion banka eða tengdum félögum í störfum sínum. Þeir sem t.d. sinna reglubundið hagsmunagæslu og/eða ráðgjafarstörfum fyrir framangreinda aðila og hafa meirihluta tekna sinna af viðskiptum við þá uppfylla ekki þetta**



skilyrði. Þó er heimilt að skipa starfsmenn Stefnis, sem uppfylla önnur skilyrði þessarar sáttar, í stjórn Kynnisferða.

- b) Þeir sem SF VII skipar í stjórn Kynnisferða, skulu ekki vera tengdir keppinautum Kynnisferða í gegnum atvinnu, stjórnarsetu eða eignarhald. Sama á við um maka ofangreindra aðila í gegnum atvinnu sem lykilstarfsmenn, stjórnarsetu eða eignarhald.

Sama á einnig við um framkvæmdastjóra (forstjóra) og lykilstarfsmenn sem SF VII kemur að ráðningu á. Framkvæmdastjóri sem SF VII kemur að ráðningu á skal jafnframt vera óháður Arion banka í skilningi a) liðar 1.2.

- c) Framkvæmdastjóri Stefnis og þeir aðilar sem sitja í stjórn Kynnisferða fyrir hönd SF VII skulu undirrita yfirlýsingu. Í henni skulu hlutaðeigandi lýsa því yfir að hann hafi kynnt sér þau fyrirmæli sem felast í ákvörðun þessari og hann heiti því að virða þau að öllu leyti að viðlagðri ábyrgð.

1.3

Upplýsingagjöf til hluthafa SF VII

Stjórn og starfsmenn SF VII skulu haga samskiptum við hluthafa SF VII með þeim hætti að jafnræðis sé gætt og að samkeppni á þeim markaði eða mörkuðum sem Kynnisferðir starfar á sé ekki raskað. Í upplýsingamiðlun til hluthafa SF VII sem eiga eignarhluti í keppinautum Kynnisferða skal þess gætt að viðkvæmar viðskiptaupplýsingar sem skaða geta samkeppni berist ekki til þeirra.

2.

Brottfall skilyrða

Þau skilyrði sem fram koma þessari sátt falla niður þegar SF VII missir yfirráð yfir Kynnisferðum. Aðilum er heimilt, sameiginlega eða hver fyrir sig, á hverjum tímapunkti að óska eftir því að skilyrði þessi verði felld úr gildi, að hluta eða í heild, vegna breyttra forsendna, sbr. 24. gr. stjórnarsýslulaga nr. 37/1993.

3.

Viðurlög

Brot á þeim fyrirmælum sem fram koma í sátt þessari varða viðurlögum skv. IX. kafla samkeppnislaga.

4.

Upplýsingagjöf til Samkeppniseftirlitsins

Stjórn Stefnis skal upplýsa Samkeppniseftirlitið fyrir 15. september nk. með bréfi um hvernig framangreind skilyrði verði tryggð. Einnig skal senda eftirlitinu undirritaðar yfirlýsingar í samræmi við c-lið ákvæðis 1.2.

Samkeppniseftirlitið

Páll Gunnar Pálsson